



Sesida dals

Communitgà ils

Protocol nr.

17 december 2019

20 december 2019

951

Incumbensa Kohler

concernent il mecanissem per las vischnancas per cumpensar il minus d'entradas fiscalas chaschunà da la RFFA

Resposta da la regenza

Cun la lescha federala davart la refurma fiscala e la finanziaziun da la AVS (RFFA) ch'è vegnida acceptada dal suveran ils 19 da matg 2019 e messa en vigur per il 1. da schaner 2020 ha il legislatur surpiglià l'art. 196 al. 1^{bis} en la lescha federala davart la taglia federala directa (LTFD; CS 642.11). Tenor questa disposiziun vegnan ils chantuns obligads d'indemnisar las vischnancas adequatamain per las perditas che resultan da la RFFA. La concepziun concreta da questa indemnisaziun surlascha il legislatur federal als chantuns.

Cun realisar la RFFA en il dretg chantunal ha la regenza proponì – suenter avair tschertgà intensivamain in model adattà – da far questa indemnisaziun sur la gulivaziun da finanzas intercommunala, uschia ch'i n'è betg necessari da midar ina lescha (missiva tar la revisiun parziala da la lescha chantunala da taglia, carnet nr. 3 / 2019 – 2020, p. 82 ss.). Questa proposta è vegnida discutada qua e là en la debatta dal cussegl grond, è però restada senza cuntraproposta, uschia che l'indemnisi-aziun vegn a vegnir realisada a partir da l'onn da gestiun 2021 sur la gulivaziun da finanzas intercommunala, concretamain sur in augment dals meds finansials per la gulivaziun da resursas da var 7 milliuns francs.

L'incumbensa Kohler pretenda ina indemnisaziun sin basa dal minus effectiv tar las entradas pervia da la reducziun da la taglia sin il gudogn. Ella sa basa sin ina contemplaziun statica e survesa che l'intent da la reducziun da la taglia sin il gudogn è oravant tut stada quella da mantegnair interpresas existentas, da pussibilitar ulteriuras investiziuns da questas interpresas ed (en ina dimensiun pli pitschna) dad attrair novas interpresas. In engrondiment considerabel d'ina interpresa existenta u la domiciliaziun d'ina nova interpresa cun gudogns considerabels e cun taglias sin il gudogn

relevantas avess ussa per consequenza che minus d'entradas betg avant maun stuessan vegnir cumpensads er sin quests gudogns supplementars. Sche tut il parc industrial "Vial" vegniss per exempel occupà ils proxims onns, chaschunass quai in spustament marcant vers Domat dals meds totals ch'èn da distribuir or da la taglia federala directa. Il medem vala per las societads da domicil, per las societads da holding e per las societads maschadadas ch'existan oz e che perdessan lur status fiscal privilegià. Sche questas interpresas, ch'èn per gronda part domiciliadas a Cuira, duessan mantegnair lur sedia en il lieu actual e pajar da nov la taglia sin il gudogn cumplainamain a Cuira, stuessan vegnir prestads pajaments d'indemnizaziun er sin questas taglias sin il gudogn supplementaras. Quest spustament da las entradas supplementaras or da la taglia federala directa sin ils lieus d'interpresas fermes refusa la regenza. El n'è ni materialmain correct ni vulì dal legislatur federal. La cumpensaziun finanziala tranter las vischnancas succeda sur la gulivaziun da finanzas. La lescha davart la gulivaziun da finanzas en il chantun Grischun (DG 730.200) è vegnida messa en vigur il 1. da schaner 2016 en la furma actuala e vegn actualmain suttamessa ad ina controlla da l'efficacità. Adattaziuns che fissan eventualmain necessarias per tarar en moda pli specifica la gulivaziun da resursas pon vegnir realisadas en quest rom. Ma i duai vegnir impedì ch'i vegnia stgaffì in ulteriur sistem da gulivaziun cumplitgà che chaschunass in augment da la burocrazia. La tractativa da questa fatschenta en il cussegl grond è planisada per la sessiun d'october 2020.

L'incumbensa Kohler propona sco pretensiun eventuala in model a temp limità per midar alura a la cumpensaziun sur la gulivaziun da resursas. En quest connex vegni survejà ch'i stuess pir anc vegnir stgaffida ina basa legala cun in cuntegn che n'è betg enconuscent per la regulaziun da cumpensaziun pretendida e che quella na fiss betg pronta per l'emprim onn da cumpensaziun 2021.

Pervia da quai n'è ina regulaziun transitorica betg pussaivla gia per motivs dal temp. Sa basond sin questas explicaziuns propona la regenza al cussegl grond da refusar questa incumbensa.



En num da la Regenza

Il president:

Il chancelier:

A handwritten signature in black ink, appearing to be "D. Parolini".

Dr. Jon Domenic Parolini

A handwritten signature in black ink, appearing to be "D. Spadin".

Daniel Spadin